

Duz Douqhau Iq Ranz Gou

贵港市覃塘区蒙公镇高占小学三年级 Vangz Sihviz/黄诗怡



Ranz gou ciengx miz duz douqhau iq ndeu, de dwggyaez raixcaix.

Douqhau iq gaiqrwz raezrangrang, daengx ngoenz daengj youq song mbiengj gyaeuj, lwgda hung hoengzfedfed, sijsaeq yawj, mwngz itdingh laihaeuz doiq lwgda de couh lumj song naed rinbauj hoengz ne, aen ndaeng de baenz yienghsamgak, baihlaj ndaeng couh dwg aen bak iquetet, gok bak song mbiengj miz geij diuz mumh raez, gwnz ndang bwn hausagsag, bwn diuzrieng fongxfwdfwd. Miz seiz de gungj aen ndang hwnjdaej, caen lumj aen giuzhau ringx youq henz gungxcieuz ne! Gij yiengh duz douqhau iq dwggyaez lai ha!

Douqhau iq gij yiengh gwn doxgaiq couh engq mizyinx lo. Gijgwn de coengzlai mbouj rox yiemz, de cij gwn di byaek couh ndaej baenz donq lo, gij byaek couh dwg lauxbaeg, byaekhau caeuq nywjheu, caemhcaiq gaeu duhdoem ro caeuq gaeu maenz ndengj hix ndaej gwn guh donq dem. Gou ciengzseiz bae rog beng di nywjoiq dauqma hawj de gwn.

Douqhau iq baez gwn doxgaiq, aen bak song mbiengj cungj dwg bongz hwnj mboep roengz, geij diuz mumh haenx hix doenghyamyam. De gwn imq le, cungj gyaez aeu song gaiq nyauj naj uetuet aen bak iq, youh dawz henz ndang cingileix seuq bae. Gou sim siengj, neix dwg aenvih duz douqhau iq neix gyaez dieg seuq ba, de itdingh dwg siengj hawj aen dieg youq de bienq ndaej seuqsetset bae.

Douqhau iq ninzndaek seiz, gij yiengh hix gig ndeiri. De cungj dwg ngengq ndang ninz, aen ndang gungj dwk, seiq gaiq din sueknguej. De fangzhwnz seiz, dinzfwngz cungj saenzdedded, aen gyaeuj doengh bae doengh dauq, menhmenh dwk, aen ndang hix gaen dwk doengh hwnjdaej, doeklaeng, geij diuz mumh hix doengh lo, yawj gij yienghceij de, mwngz itdingh gig siengj hemq singj de.

Duz douqhau iq ranz gou caen dwggyaez ha! Siuj baengzyoux, mwngz itdingh hix gig siengj ciengx duz ndeu ba!

(lauxsae son'gyauq: Cuh Veimingz/朱卫明)

Daxbuz Nyaengq Mbouj Daengx Haenx

Gou miz boux daxbuz nyaengq guh mbouj daengx ndeu, ngoenz-ngoensz daj haet daengz haemh nyaengq mbouj daengx, danhseih mbouj caengz nyi de ienq saek coenz.

Banhaet romh, gou lij ninz youq gwnzmbonq loqhwnz seiz, daxbuz couh hwnq lo, cawj ngaizomj hawj gou caeuq dahmeh, ciuq sibgvenq daxgoeng cawj gyaujswj. Daxbuz rox daxboh ceiq maij gwn mienh, ndigah youq daxboh hwnq gaxgonq, couh cawj ndei mienh lo.

Gwn liux ngaizromh, dou cungj ok rog bae lo, ndaw ranz dan lw daxbuz caeuq daegnuengx iq lo. Daxbuz coengh daegnuengx iq catheuj, swiqnaj, bwnq de gwn-ngaiz, saeg buhvaq iq de. Guhsat gijneix liux, daxbuz lij mbouj lumz caeuq daegnuengx iq guhcaemz


yaep ndeu.

Daengz banhaemh, daxbuz youh hainduj bwh ngaizcaez cienz ranz lo. Gou cuengqhag caeux, daxbuz couh hawj gou caeuq daegnuengx iq gwn gonq. Caj daxboh, daxmeh, daxgoeng cungj dauq daengz caez lo, daxbuz cij naengh roengzdaej caeuq daihgaya doengzcaez gwn.

Langh cuengqgyaj le, gou couh iugouz daxbuz dawz gij saeh ganq daegnuengx iq haenx gyau hawj gou guh, neix hawj daxbuz ndaej yietnaiq ndei, soeng baez ndeu. Danhseih, daxbuz cungj naeuz: "Gou boux ndeu gag nyaengq couh ndaej, mwngz vaiq bae sij cozyez ba."

Neix couhdwg daxbuz gou—saeqsim, gaenxguh youh depgyawj. Daxbuz, gou gyaez mwngz!

(Cangh Mungyauz)



Aenmbwn Ndaundei Gyanghaemh

Haemh ronghndwen caem-rwkrwk nei. Ronghndwen hausak unqswnh ciuq coq gwnz daiz-cueng, gapbaenz fuk doz haemh roenghndwen gyaeundei ndeu. Seiz neix, gou cingq youq ndaw caemrwk neix simcaem hoz-maez.

Youq gwnz mbaw baengz mbwnlaep, doengh aen ndaundei iq lwgda yaepyaep yekyek okdaeuj lo. Gyoengq ndaundei youq gyang mbwn baez yaep baez yaep, lumj han raeuz camndei. Gyang mbwn miz geij duj fwj iq menh byaij menh bae, lumj diuz saicouz nei, dang doengh ndaundei hawj gyoengqde fwd ndoj fwd ok, yawj hwnjbae lumj caeuq vunz lai guh gaemhndoj nei.

Dahcej ronghndwen daenj ndangdaenj lamzoiq, riunyumj baez ndeu, loh heuj haungaenz okdaeuj. Youq henz ndang de cingq biufouz miz di fwj mbang ndeu. Gyoengq fwj de daenj gien vunjsa mbang youh mbaeu youh hau ndeu, biu bae biu dauq, lumj dahsien diuqfoux

nei. "Gyoengq dahsien" lau rongh-ndwen mbouj miz rengz, ndigah daej bengdaz de; lau ronghndwen gaggdog, ndigah daej buenx de.

Youq haemh caemrwk neix, dahcej ronghndwen caeuq gyoengq ndaundei doxbangx doxbuex, ciengq go'ngauzlamq, laeglemx ganggjoj. Yienghneix le, de mbouj gagdog lo. Vunz gwnz deihi ngiengx gyaeuj muenghyawj mbwn ndau-ndei. Mbwn ndaundei yawj hwnjbae saenzmaed dangqmaz, vunz couh bien haujlai gojgaeq sengdoengh yinxvunz.

Mwngz yawj, mbwn ndaundei gyanghaemh gyaeundei dangqmaz! Youq gyang mbwn youh ndaem youh lamz, miz rim ndaundei ronghrigrig, lumj baez naed baez naed raemx rongh saekngaenz; venj miz aen ronghndwen gaeuzgege nei, lumj aen makgai deng mbwn haemh haeb gaemz ndeu……Gou bomq youq henz daizcueng, ngeix sam ngeix sei.

(Dingh Cinz)

